

"Ricordati di U Paisacciu"

Per andà ind'è isse loche, ùn c'era chè chj-  
 assi : da Belgudè pigliavamu per Saroccu cù  
 i sumeri o à pedi, lungavamu A Pruniccia è  
 sbuccavamu à a Cappella di Cinzia ; falavamu  
 per stradò fin'à u Ponte à u farru. Tandù  
 c'era un chjassu à piglià chè sbuccava ind'  
 a Bocca di a casa à a Croce. Ci vulia à  
 passà à spalla di muntagna, a chjamavanu A  
 Spelonca, a casa di e parnice. Passendu, tu-  
 ccavamu u pagliaghju di "François" è quellu  
 di Roccu. E' u sgiò Cùstantinu era ghjustu  
 accanto à u Paisacciu.

Facia u caldu d'estate, u sole cimbollava ;  
 c'era da piantà i banagnè ; i ficandiani  
 salvaticchi eranu zuccaru. Un ci vulia micca  
 troppu scartassi da issi chjassi è da isse  
 stradelle : a machja era forte.

Quando andavamu à caccia à qualchi cinghjale,  
 lucendu luna, era un splendore. Guardava  
 isse stelle è mi paria di sente a so voce,  
 u mare in fondu si vidia à tramezu à l'alivi  
 è e lecce ; paria ch'elli ragiunessinu.  
 L'onde di u mare picchjavanu à quelli scogli  
 è quandu si ritiravanu mi paria sente u  
 rimoru di un respiru ; è chè frischettu mi  
 falava in faccia !

Qualchè cinghjale u sintia staccassi da isse  
 petre, à tuccà a gorga di u sgiò Cùstantinu  
 è quella di u Maistrellu ; è qualchè mugghju  
 di volpe.

Pudiate pinsà ind'è isse loche tranquille :  
 a macchja era à pruposta ; si pristavanu  
 issi tighjali isse Gorghe, issi piobbi in  
 fondu, iss'alivi intra-vasati. Ind'i chjosi  
 posti à granu è à orzu, à a ciuttata di u  
 sole, si vidia e ghjente invia sumeri, boi ;  
 s'affaravanu à rientre ind'è so case.  
 A' a ciuttata di u sole, qualchè banda di cu-

lombi s'abbatianu per appullassi in i lecci. A'  
 tramezu à e so piume, l'ale luccicavanu ; sintia  
 u sciappitime di l'ale.

U locu più secretu era u Paisacciu.  
 U Paisacciu d'appressu à u mo babbu, hè statu  
 abitato sopr'à tuttu da i pastori. Eju, m'arricor-  
 du d'avè vistu nant'à e sponde di e finestre, e  
 catucce ; restavanu l'incadramenti di i muri ar-  
 ritti. Oghje sò cuparti di macchjoni. A dumenica  
 isse ghjente cullavanu ind'è un pagliaghju tras-  
 furnatu in cappella à precà.  
 Sin'à qualch'annu, andandu à caccia, c'era sem-  
 pre a statua di Santa Taresa.

I pastori arrivavanu ancu da l'Ostriconi, da e so  
 case è tutte e faccende si facianu ancu i sumeri.  
 Dopu à e prighere ind'a cappella, si riunianu  
 nant'è l'arba à contà e so storie ; chjinati nant'  
 è i muri, i zitelli stavanu à sente à i vecchji ;  
 ghjerenu incantati.

Guasi tuttu si rapurtava à a natura : l'occupazi-  
 one ùn mancavanu trà l'arati, e legne, fà u pane,  
 l'animali, mette à l'apprumessu granu, orzu, fenu,  
 alive...

Unu aiutava à l'altru ; e moglie s'occupavanu à  
 preparà a cullazziò, a minestra.

Ambroggiu PAZZONI.

(séguita à u prussimu numaru)

000 R U G A 000

000 A B B U N A M E N T U 000

A' nome di CISMONTE città universitaria 20250 CORTI  
 Bastia 20200.

CASATA : ----- NOME : -----

INDIRIZZU : -----

Ruga (abbonamentu) per un annu 50 F (10 numeri  
 l'annu).

Pagamentu : sceccu di posta o di banca o in  
 soldi.